

Arapska liga razmatra novu misiju u Siriji

12 februar 2012 Izmijenjeno 14:42 CET

Pregovori o zajedničkoj posmatračkoj misiji arapskih zemalja i UN-a odvijaju se u Kairu u vrijeme bombardiranja Homsa



Nova misija imat će 3.000 posmatrača, kako Al Jazeera saznaje iz izvora Lige (EPA)

Sirijske snage sigurnosti bombardirale su dijelove grada Homsa u pokušaju da uguše pobunu protiv predsjednika Bashara al-Assada, u vrijeme kada se ministri vanjskih poslova Arapske lige sastaju da razmotre slanje nove posmatračke misije u tu zemlju u saradnji sa Ujedinjenim narodima (UN). Ministri Arapske lige u nedjelju se sastaju u Kairu, gdje će razmotriti uspostavljanje zajedničke posmatračke misije, sačinjene od predstavnika Lige i UN-a, koja bi zamijenila posmatračku misiju Lige suspendiranu prošlog mjeseca.

Prema saznanjima Al Jazeera iz izvora Lige, nova misija bit će međunarodnog tipa, imat će 3.000 posmatrača, a Liga će biti odgovorna za njen nadzor. Reporterka Al Jazeera **Rawya Rageh**, koja se javila iz Kaira, kazala je da ministri Lige računaju na podršku UN-a. „Razmotrit će i pitanje da li u misiju treba uključiti i druge zemlje, ili joj promijeniti mandat, kako bi bila mirovnjačka misija“, kazala je ona.

Pitanje priznanja opozicije

Očekuje se da će posmatrači biti državljani arapskih zemalja, dok će druge zemlje omogućiti potrebnu opremu. Prema riječima zvaničnika Lige, postoji i prijedlog da se uspostavi pozicija izaslanika za Siriju UN-a i Arapske lige, a moguće je da će neke države također predložiti da Liga službeno prizna opoziciono Sirijsko nacionalno vijeće. „To je vrlo težak proces – Arapska liga je jasno stavila do znanja opoziciji da to ovo tijelo ne može učiniti, ali da je moguće da ih države pojedinačno priznaju“, kazala je Rageh.

U međuvremenu, nastavlja se opsada grada Homsa, gdje je, prema riječima aktivista, najmanje četvero ljudi ubijeno u subotu, dok su također pronađena tijela troje ranije nastradalih civila. Sirijske snage sigurnosti u subotu su napadale Homs i Hamu. U subotu je državna vojska tenkovima i raketama napala Homs, a naselje Bab Amr bilo je pod stalnom paljbom. Tokom vikenda, snage sigurnosti idu od kuće do kuće u Homsu, u potrazi za opozicionim borbicima, izvijestili su anti-vladini aktivisti. Prema njihovim riječima, u ovom gradu je ubijeno 300 ljudi od četvrtog februara, kada je počeo posljednji napad na Homs.

Izvori: Al Jazeera